

# Tiada limpahan air pasang besar

metro 7/10

**PELABUHAN KLANG:** Walaupun hari pertama fenomena air pasang besar menyaksikan tiada limpahan air di sekitar Klang, pihak keselamatan tetap mengambil langkah berjaga-jaga bagi menghadapi kemungkinan keadaan lebih buruk, terutama jika hujan lebat.

Penghulu Mukim Pulau Indah, Mohd Halil Selamat, berkata keadaan sepatutnya tidak begitu buruk kecuali berlaku hujan lebat di Lembah Klang.

"Ketika itu air termasuk dari Kuala Lumpur turun ke Klang dan tersekat oleh air pasang memungkinkan banjir besar," katanya, semalam.



**MELIMPAH...air laut naik ke jalan di jeti Pulau Ketam, Klang, semalam.**

Pada hari pertama fenomena air pasang semalam, hampir tiada kesan banjir dilihat termasuk berhampiran stesen komuter Pelabuhan Klang yang hanya 20 meter dari jeti.

Keadaan itu dianggap selaras dengan jangkaan awal Jabatan Pengairan dan Saliran (JPS) Klang yang tidak menjangka sebarang banjir kilat, kecuali berlaku hujan dan angin kencang.

Juruteknik JPS Klang, Mohamad Tawil, berkata kenaikan air 5.7 meter pada jam 5.12 pada pagi tidak menyebabkan banjir atau limpahan kerana ia setara dengan benteng di pesisir pantai.